

SUKUXOKA!

**Kungoko ke ndithi, lahlani ubuxoki,
thethani inyaniso elowo nommelwane wakhe;
ngokuba singamalungu, omnye elelomnye.
KWABASE-EFESE 4:25**



Uze ungangqini ubungqina obubuxoki ngommelwane wakho.

IEKSODUS 20:16

Abagcine amampunge angento yanto Bayishiya inceba yabo.

UYONA 2:8

Musani ukubuyekeza ububi ngobubi nakubani. Yenzani izinto ezinyanisekileyo emehlweni abantu bonke. Masihambe sinyanisekile, njengasemini; kungekhona eburheletyweni, nasekunxileni, kuhenyuzo, nasekurheletyweni, kungekuzo neenkani, nomona. KWABASEROMA 12:17; 13:13

sinyamekela izinto ezilungileyo, kungekuphela nje emehlweni eNkosi, kodwa nasemehlweni abantu. 2 KWABASEKORINTE 8:21
Elokugqiba, bazalwana, ndithi, iinto zonke eziyinene, iinto zonke ezindilekileyo, zilumkeleni ezo zinto. KWABASEFILIPHI 4:8

...nihambe ngokonwaba nangokuzola, ninokuhlonela uThixo, nokunyaniseka. eyoku-1 kuTimoti 2:2

...kwizinto zonke uzimisele ukuphila ngokunyanisekileyo.
KUMAHEBHERE 13:18

Lowo uthi, Ndimazile, abe engayigcini imithetho yakhe, ulixoki, kulowo ayikho inyaniso. Ngubani na ixoki, ingenguye okhanyelayo ukuba uYesu unguye uKristu? Lowo ungumchasi-Kristu, omkhanyelayo uYise noNyana. eyoku- 1 kaYOHANE 2:4, 22

Ukuba umntu uthe, Ndiyamthanda uThixo, wamthiya umzalwana wakhe, ulixoki; kuba lowo ungamthandiyo umzalwana wakhe ambonileyo, angathini na ukumthanda uThixo angambonanga? Nguwo lo umthetho esinawo uvela kuye:ukuba athi lowo umthandayo uThixo, amthande nomzalwana wakhe.
eyoku- 1 kaYOHANE 4:20-21

Ndibathiyile abagcine amampunge angento yanto; Ke mna ndikholose ngoYehova. Mawubotshwe umlomo wobuxoki; Abathetha izinto eziziindlayo, ngendelo kumalungisa.
INdumiso 31:6, 18

Hayi, uyolo lomntu ombekayo uYehova inkoloseko yakhe,
Ingabheki kwabakhukhumeleyo, nakubanxaxhi bexoka.
INDUMISO 40:4

... uya kuvingcwa umlomo wabathetha ubuxoki. Akayi kuhlala
endlwini yam Owenza inkohliso; INDUMISO 63:11; 101:7

Indlela yobuxoki yisuse kum, undibabale umyalelo wakho.
Ndikuthiyile ukuxoka, lisikizi kum; umyalelo wakho
ndiyawuthanda. INDUMISO 119:29,163

Wuhlangule, Yehova, umphefumlo wam emlonyeni wobuxoki,
naselulwimini olunenkohliso. INDUMISO 120:2

Ezi zinto zintandathu izithiyile uYehova, Zisixhenxe zilisikizi kuye:
Amehlo akhukhumeleyo, lulwimi oluxokayo, nezandla eziphalaza
igazi elimsulwa, yintliziyo eyila iingcinga zobutshinga, ziinyawo
ezikhawulezayo ukugidimela ebubini; Lingqina elithetha ubuxoki,
nohlwayela ingxabano phakathi kwabazalwana.
IMIZEKELISO 6:16-19

Oyifihlayo intiyo ungumlomo wexoki; Ohambisa intle bendwane
usisidenge. Ebuninzini bamazwi akusweleki sono; Owubambayo
umlomo wakhe unengqiqo. Yisilivere enyuliweyo ulwimi
lwelungisa; Intliziyo yabangendawo yintwana engeyakonto.
IMIZEKELISO 10:18-20

lingcinga zamalungisa zithe tye; Amacebo abangendawo
yinkohliso. Ophefumla inyaniso uxela ubulungisa; Ingqina
elixokayo lixela inkohliso. Kukho ophololoza njengokuhlaba
kwekrele; Ke lona ulwimi lwezilumko luyaphilisa. Umlomo
wenyaniso uzimasekile kwaphela; Ke lona ulwimi oluxokayo
lolwephanyazo. Inkohliso isentliziyyweni yabayila ububi; Ke bona
abacebi boxolo luvuyo. Ilungisa aliqubisani nobubi; Ke bona
abangendawo bazele bububi. Ungamasikizi kuYehova umlomo
oxokayo; Abenza inyaniso ukholisiwe ngabo.
IMIZEKELISO 12:5, 17-22

Ilungisa liyithiyile into ebubuxoki; Ke yena ongendawo uyanukisa, enze okuziintloni. IMIZEKELISO 13:5

Inggina elinyanisileyo aliwathethi amanga; Ke lifutha amanga ingqina elixokayo. Ubulumko bonobuqili bukukuyiqonda indlela yakhe; Ukumatha kwezinyabi yinkohliso. Inggina lenyaniso lihlangula imiphefumlo; Ke elifutha amanga liyinkohliso. IMIZEKELISO 14:5,8,25

Onobubi uwubazela indlebe umlomo wobuxoki; Umntu olixoki ulibazela indlebe ulwimi olubi. Ayisifanele isidenge intetho ekhukhumeleyo; IMIZEKELISO 17:4,7

Lilungile ihlwempu elihamba ngengqibelelo yalo, Ngaphezu komlomo ojibilizayo, esisinyabi yena. Inggina elixokayo alibi msulwa; Ofutha amanga akasindi. Inggina elixokayo alibi msulwa; Ofutha amanga uyatshabalala. Umnqweno womntu yinceba yakhe; Ke lilungile ihlwempu ngaphezu kwendoda enamanga. IMIZEKELISO 19:1,5,9,22

Sinencasa endodeni isonka sobuxoki; Ke emveni koko umlomo wakhe uya kuzala luhlalu. IMIZEKELISO 20:17

Ukuzuza ubuncwane ngolwimi oluxokayo Ngumphunga ophephethekayo wabafuna ukufa. IMIZEKELISO 21:6

Lowo uthiyayo uhanahanisa ngomlomo wakhe, Ufumbe inkohliso ngaphakathi kwakhe; Xa ethetha kakuhle, musa ukukholwa nguye; kuba kukho amasikizi asixhenxe entliziyweni yakhe. oyithiyileyo igutyungelwe ngenkohliso, ububi bakhe buya kutyhilwa phambi kwebandla lonke. Ombe isihogo weyela kuso; Oqengqa ilitye, libuyela phezu kwakhe. Ulwimi oluxokayo luyabathiya abacinezelweyo lulo; Nomlomo ocengacengayo usebenza ububi. IMIZEKELISO 26:24-28

Musa ukubizwa ngokuba nguntlebi, okanye ulalele ngolwimi lwakho; INTSHUMAYELI 5:14